

盤
洲
文
集

盤洲文集卷第十五

陳制五

賜王之望辭免端明殿學士不允詔

朕承洪業託士民之上若涉淵水未知攸濟思得天
下之傑合謀相輔以成治功故高位厚祿所不敢惜
以卿有慷慨之志更中外之久迺自首諫躋之政塗
今蓋未幾也而雅懷莫遂公論弗孚雖欲留以自近
顧不可得書殿美職乃進退大臣之優禮何至遂有
挂冠之請哉

賜步軍司後軍統制崔阜辭免鄂州觀察使

不允詔

朕注意戎事醲於用賞高秩美官未嘗愛惜執此之信有如皦日卿扞敵淮壤厥有茂勲吉語首馳朕心以懌觀風之任躡等而遷益思盡忠勿事冲避

賜錢端禮辭免參知政事兼權知樞密院事
不允詔

昔舜命九官濟濟相遜奮庸亮采靡事不理朕甚慕之卿學足以行道識足以決疑入踐鈞樞能斷國論疇咨選衆宜幹政機兼冠宥庭助我經武撫詞相推無媿于古渙汗不反亟其祗服

賜虞允文辭免同知樞密院事兼權參知政
事不允詔

朕以眇身獲保宗廟天下治亂在予一人非邦家之
英同德一心裨助萬務則安能有濟哉卿充積學問
練達事機中外踐更所言可績比參宥畫具見良圖
宜副本兵兼預政柄贊襄之效倚俟有成祇服恩榮
無勞謙挹

賜王剛中辭免端明殿學士簽書樞密院事
不允詔

朕兢兢業業一日二日萬幾寤寐有德之輔天下賢

哲肯從我遊者吾能尊顯之卿有佐王之學有拔俗之材入從出藩咸著顯聞復還禁路風望隱然入助籌帷孰曰不可循墻之避非所願聞

賜戚方辭免捧日天武四廂都指揮使不允
詔

宰輔以汝求免廂部事入奏夫爵祿者朕所以厲世磨鈍也介冑之士有安邊卻敵之効達於朕聽賞不旋日惟恐忘其功也卿忠不顧身名副其實旂常有紀褒律匪私宜略撓詞亟祗茂命

賜皇子少保鄧王懌生日詔

新穗曆於三微甫迎獻歲視冀階之雙秀厥有休符
爲吾元子之祥得彼列僊之壽爰推恩渥以頌熾昌
賜太尉昭信軍節度使曹勛生日詔

歲籥更端方歌青煒之曲禁門通籍不曷赤松之游
式盼牢醴之珍用介袞旄之壽

賜簽書樞密院事王剛中生日詔

勅剛中獻歲發春景踰三宿元精生佐秀括五行爰
推盼式之常以相壽祺之永

賜左武大夫宜州觀察使龍大淵辭免落階
官不允詔

朕踐好之始擇材爲使必得長於專對者以堅二國之盟卿請習古訓識慮淵深久於潛藩終始如一盡忠致主畏遠權勢出入禁闥厥有休聲張旌越疆弗憚遐阻俾脫橫列正名廉車慶不虛行無事搆固

賜陳康伯乞解罷機政不允詔

朕以菲質膺太上傳授之重蚤夜懍懍不敢以位爲樂念宰相助理萬機圖任之失則不特噬劑之悔而已故力起舊德還以魁柄袞繡復來即日無甲兵之問顯相肇祀天闔其祥殆亦燮理之効也方倚碩望尊彊朝廷雖目眚未平顧豈不能奉我清閒之燕坐

而論道乎上印勾歸朕不敢聽

賜參知政事虞允文乞宮觀不允詔

君爲元首臣爲股肱蓋一體相須所以合謀同德計
安天下者也卿輔政半載屢告嘉猷筋力方強思慮
甚審何嫌何疑遂欲引疾而去詳味來章深所未曉
賜虞允文乞宮觀不允更不得再有陳請詔
卿秉尊朝之德有憂國之風造膝惓惓備見忠款朕
方倚以爲治庶幾羣厲無前之績未嘗有纖介之間
也移疾勾閑何易退如是耶載覽所陳難以曲徇
賜知福州趙子瀟乞致仕不允詔

大夫七十而致事蓋血氣既衰懼其漏盡鍾鳴而不
知止足之戒故先王制禮大爲之防而後世以此約
三尺之法也烏有神明之胄筆橐之桀齒髮鼎盛治
有能名而欲抽簪高蹈則國家安得而從之囊封
來政爾辭費亟其視事勿復卧閣

賜凌景夏辭免復徽猷閣直學士不允詔

朕推紫壇之澤于四海無遠邇之間况甘泉之舊乎
卿性資夷粹操履端方出鎮藩維有慈祥之政入司
銓部有平允之聲歸憇叢祠未尋故步茲還內閣之
職實聽輿人之言奚用撝章尚留茂渥

賜王大寶辭免礼部尚書不允詔

卿履道醇固蓄德雄剛從列諫坡積有令問退休林
壑恬適泰然趨節遠來得惓惓不忘君之誼入對文
石筋力未衰宜長春官用資獻替之益已盼渙命奚
事搆文

賜趙密再上表辭免少保不允仍斷來章批
荅

省表具之朕講修軍政睽遇一臣念堅甲利兵嘗冒
死亡之地故高秩厚禮特優終始之恩茲宿將之告
休以貳公而佚老使師衆益思於報國知朝廷不負

盤洲文十五
王
於用人朕命已行汝辭毋再所請宜不允仍斷來章
賜賀允中再辭免知樞密院事兼權參知政
事恩命仍斷來章批荅

二老來歸於西伯以齒爲尊九官相推於舜朝匪辭
所命我圖耆艾俾典事樞庶幾制勝於兩楹如彼運
籌之三傑國有成漢人無間言當思遇合之難共講
治安之策畀之召節旣不鑿坏以爲高覽此奏亟何
乃叩闥而未已

賜文武百寮湯思退等上表請

皇帝御正殿復常膳不允批荅

涉秋以來天作淫雨害我穡事朕不席輟餐惕然靡寧天裁警予夫豈偶然朝思夕惟顧無以仰荅譴告雖沴氣欲解而沈沒之田農方告病公卿大夫有足國惠民之策能紓我之憂則爲愛君復常之請姑置之可也

賜湯思退等再上表請御正殿復常膳不允批荅

永初遇鴈雩之異不陳庭下之車祖己戒雉鼎之祥尚改廟中之祀顧予不德方古有慚雨集七八月之間遂成積潦郡災什四分以上迨及數城雖采納於

讜言亦舉行於荒政莫救西成之害不勝南面之憂
惟卿荐貢於誠忱在朕正懷於抑畏上棟下宇難講
大昕之儀右馘左殽敢豐中昊之御

賜湯思退等三上表請

御正殿復常膳允

批荅

朕罪已畏威便坐未嘗安席齋心食淡厚味不復充
庖求令咎端敢爲文具雖恐懼於斯而踰月顧貶損
何足以應天卿等咸造廣庭屢騰需牘具陳稽古之
訓深見尊君之誠陞九級而上廉勉從來請物百羞
以俟饋祗媿多儀所冀責難之恭交修除害之利

賜楊存中上表再辭免同都督江淮軍馬不
允仍斷來章批荅

卿材資果毅謀慮沉深百戰摧堅屢奏藁街之捷八
營掌武久尊蘭錡之權時有弛張色無喜愠茲邊塵
之未靖豈王事之可辭當思注意之隆必奮折衝之
効夫李靖專用兵之善蓋房杜濟之以文若子儀堅
事上之誠故齊晉比之爲禰宜蠲冲節往副廟謨

賜王之望再辭免參知政事不允斷來章批
荅

朕臨淵思濟寤寐實求外而一路一州之寄內自郎

吏九卿而上曷嘗易以印綬予人況一二輔弼所與
斷天下事而繫國家重輕者哉以卿通達治體文武
憲邦事不避難精於遠慮必能同德合謀興今復古
無媿於丞民車攻之詩茲用決之朕心峻登政路非
以私卿一己之榮也卿當體朕責成之意夙夜孳孳
同寅和衷發舒賢緼以振可大之業屢章不已非所
望焉

賜錢端禮再辭免簽書樞密院兼提舉德壽
宮不允仍斷來章批荅

朕仰惟 太上皇邁德勛華以神器之重傳歸在子

雖一月三朝竭四海之奉而綵衣問寢不獲旦旦左右若稽 皇祖嘗以廷臣領使于慈宮 朕跽以有請而聖德謙託因仍未皇也以卿受知兩朝出入禁闥況材高識遠籌邊甫歸當此治外宜在樞機之廷崇我孝養立我武事一舉而兩得之又何辭焉

賜虞允文再辭免同簽書樞密院事不允仍
斷來章批荅

夫右府本兵蓋顯戎政北樞垂象寔接階符茲求藝圃之英俾贊籌帷之密旣興言之相慶猶遜牘之重陳雖謙冲者君子之常而忠力者股肱之事當思多

壘遂展勝謀勿徇搗情以留渙命

賜陳康伯再辭免尚書左僕射不允仍斷來
章批荅

辛巳之役中外騷然卿坐于廟朝智略輻湊雍容談
笑能解非常之紛今邊陲受敵丞相位虛思我舊人
式遏亂略楊廷之後詔札屢頒衮衣來歸國人胥慶
宜據遠業遂寢摛詞

賜錢端禮再辭免參知政事兼權知樞密院
事不允批荅

卿練習世故有猷有爲隄度庶事猶燭照數計而龜